

TOTIHITAWĒ THAMOTIMA THE Ā

PREĀMBULO

Enaha thē puhi tao kuaai, wā rēamai thē, peheti he usukuwē thē, wā toprao thē kâi, hei thē pē nahi taemopou piyēkou, ĭhī thē pē nahi ĭhīpimopouha totihitawē thamotima thē hami he usukuwē thē pē nahi taeayou totihitaopē,

Enaha thē puhi tao kuaai, totihitawē thamotima thēni thē taimi ha, thē pē kâi shomiaprai ha, hei wārĭtiwē thamotima thē kipi thaprarema. Komi pēmaki rē kui pēmaki kīriihou mai, pēmaki kâi no preaai mai pēmaki pērihou piyēkopē, pēmaki ā topraopē, pēhetiapramotima thē pē hami.

Enaha thē puhi tao kuaai, totihitawē thamotima thē rē wā nosie huamotima thēni thē nahi thapopē, komi urihitheri thē pē no yuayou maōpē,

Enaha thē puhi tao kuaai, thē pē pērihiwē rē piyēkēi thē pē puhi taamayōpē thē pē rĭmimayōpē,

Enaha thē puhi tao kuaai, komi urihitheri ONU thē ha thē pehetiapraihe, totihithawē thamotima thē hami, suwē wāro pei pēmaki no rē kui thē pē no ā hē usukuwē, kama pēni thē ā wawemarēmahē thē pē puhi rē taamaīwēi,

Enaha thē puhi tao kuaai, komi urihitheri pē rē kui ONU thē iha thē pē ā wawētokema totihitawē thē ā nosi riā ha poheni,

Enaha thē puhi tao kuaai, thē pē ā rē wawētokenowēi thē pēni thē ā hīriapehe thē ā nosi kâi popehe

ĭhī thē no ā ha TOTIHITAWĒ THAMOTIMA THE Ā wēyēi piyēkouhe.

Hetipētēwē 1

Kōmi thē pē rē pēriprawē rē piyēkēi, he usukuwē thē pē keprou ai thē ā rēamaihā no ā heparohowē, totihitawē thē pē riā rē thaiwehei hami, thē pē puhi tao kâi pērihiwēha, thē pē puhi kâi katehewēha hawē kama thē pē mashi shīro pērihimopē.

Hetipētēwē 2

Kōmi thē pē ihami totihitawē thamotima thē kuprawē , thē ā rē maiha thē pē pēriprawē, wā katehano thēni thē wāhā no wayoano, suwē, wāro, pei kahi, thē pē rē reahumouwēi, napē thē ā, no matohipi, no preaarewē, thē pē rē kepronowēi hami, ai thē pē sho, shomi urihitheri himayōumahēi.

Kōmi thē pē ihami totihitawē thamotima thē kuprawē , thē ā rē maiha thē pē pēriprawē, ma kui ai thē pēni thē pē urihipi rēpoumakuhei thē pē riā pērio toprao he yatio.

Hetipētēwē 3

Yāmi kōmi thē pē ihami totihitawē thamotima thē kuprawē thē pē rē pēriaiwei thē pē kuprawē, ai thē ā rēamai, peheti thē pē rē pēriaiwei.

Hetipētēwē 4

Ai thē pē iha horemou wamaki no ohotamopi mai, horemou ohotamomamotima thē thamai puhioni he parohowē.

Hetipētēwē 5

Thē pē shēmou taomi, thē pē wāhā kâi wārĭhithomamou taomi, thē pē shēmou wārĭtiaī taomi.

Hetipētēwē 6

Thē pē pēriprawē rē piyēkēi thē pē ihami totihitawē thamotima thē kuprawē, thē pē nahi riā hatukēmopou piyēkou.

Hetipētēwē 7

Wā nosie huamotima a hami, komi hititiwē thē pē he usukuwē, thē pē nahi kâi thapou piyēkou. Hei wā katehano thē rē kui thēni, hititiwē wā nosie huamatima ani wārĭhitho thamotima thē hami, thē pē he komi rupou piyēkou; wārĭhitho thamotima thē hami thē pē no yuo maōpē.

Hetipētēwē 8

Komi hititiwē thē pē rē kui, thē pē payeriopē nahi thaporewē pata pēni, pē nahi rē hatukēawei kama urihithēri thē pēni , totihitawē thamotima thē wārĭhitho thai maōpehe.

Hetipētēwē 9

Enaha pētawē thē pē huēamou taomi, thē pē kâi ôkamopou taomi ai thē urihi hami thē pē shimamou ayao taomi.

Hetipētēwē 10

Komi hititiwē thē pē ihami, totihitawē thamotima thē kuprawē, thē pē he pruka usukuwē, nahi thaporewē pata pē mithari hami, thē a riā hai thē a riā ha hīrĭāmoni thē rē thanowēi thē hami thē wāhā no wēyēihe tēhē, thē no ā he riā ha ruoni.

Hetipētēwē 11

Hititiwē thē pē rē kui thē pēni ai thē ma thamonomai thē pē wāhāno wēyēihe tēhē thē pehetiaprai haia maheĭha thē shurukuamou haio taomi. Nahi thaporewē pata pēni thē pehetiaprai haia maheĭha pē noa napēmou taomi.

Thē pē wāhāno wēyēyono ma mai, thē pē wāhāno wēyēyou, enaha thē thamou taomi. Hapa hote wārĭtiwē thē ani hei tēhē thē wārĭtiwē he parohowē thē thamou taomi.

Hetipētēwē 12

Ai thē puhi pētouha ayaroni , thē pē yahipi hami, thē he haprou ayou taomi, therihē pē ihami kâi, ôniōni a shimaihe tēhē thē kâi mii pario ayao taomihe, komi thē pē mithari ha wa thē wāhāno wēyēi ayao taomi. ĭhī thē pē hami totihitawē thamotima thē rē kui wā nosie huamotima thēni thē pē nahi thapou piyēkou.

Hetipētēwē 13

Hititiwē thē pē ihami totihitawē thamotima thē kuprawē, ai thē ā rēamaihā thē pē riā huu piyēkou, wa thē nahi rē pēripouwei thē urihi ha thē pē kâi riā shaponomou.

Hititiwē thē pē ihami totitihitawē thamotima thē kuprawē ĭhī thē no āhā thē pē rē pērihiwē rē piyēkēi thē pē urihipi hami, thē pē kâi riā huu, thē pē urihipi nahi kâi rē pēiprai, thē pē urihipi nahi kâi riā kōo mī yapao.

Hetipētēwē 14

Ai thē yapēkamahe tēhē, kōmi hititiwē thē pē ihami totihitawē thamotima thē kuprawē thē pē rē hithēpraamaīwēi a urihi ha, ĭhī ā hā thē pē ā riā toprao, shomi thē pē urihipi hami kâi.

Hei a hami totihitawē thamotima thē rē kui thē wāhā pomou taomi thē kâi puhipramou taomi, wā nosie huamotima nahi thaporewē pēni thē pē huēmamaihē tēhē peheti kōmi yapēkamotima thē pē hami pei thē hapa rē hupētarenowēheī thē pēni kâi.

Hetipētēwē 15

Hititiwē thē pē ihami totitihitawē thamotima thē kuprawē, kama urihi theri thē pē wāhā hirou katitou.

Thē puhi pētouha ayaroni kama urihitheri thē rē kui thē mapramai ayao taomi, totihitawē thamotima thēni hawē kama e thē wāhā riā hiroprou kuo.

Hetipētēwē 16

Wārō, suwē pē sho, kama huya thē pē riā rē toayouwei hami totihitawē thamotima thē kuprawē ai thē ā rēo taomi. Ai thē ā rēamaihā suwē , wāro pē sho thē pē riā toayou, kama theri thē pē wāhā hirou, reahumotima kama urihithēri, ĭhī thē pēni totihitawē thamotima thē hami thē pē ā rēo taomi, kama thē pē mashi riā kuprou. Shoati totihitawē thamotima thē ha thē pē ā riā toprao, thē pē toayou pario tēhē, thē pē ā toprao rē kuonowēi naha, thē ā riā toprao kuo shoao.

Kama kēkipi rē puhiyouwei, peheti kēkipi riā toayou.

Kama thē pē mashi shīroni pē shapono praukamaihē ĭhī thē no āhā totihitawē thamotima thē rē kui, kama urihitheri thēni thē nahi thapouhe, kama thē pē shaponopi kâini.

Hetipētēwē 17

Hititiwē thê pē rē kui thê pē matohipi riā kuo, totihitawē thamotima thê ha, thê pē rē perihii hami kama thê pē urihipi riā rii kuomopotayou.

Pei thê puhi pētouha ayaroni thê pē matohipi riā rēmaimihe thê pē rē perihii hami urihi ā kâi rēmai taomihe.

Hetipētēwē 18

Hititiwē thê pē rē kui ai thê ā rēamaihā totihitawē thamotima thê ha thê pē puhi tao kâi riā pērio, reahumotima thê hami, thê pē puhi katehewēha; totihitawē thamotima thê ha thê ā kâi koyokoa reahumotima wa thê riā rē hemihipraiwei, ai thê ā rēamaihā thê riā owēmamou komi thê pē mithari ha thê kâi riā owēmaihe, thê pē hirayou tēhē, thê pē owēmayōū tēhē, peheti thê ā huamou sharirou ha.

Hetipētēwē 19

Ai thê ā rēamaihā hititiwē thê pē rē kui yāmi thê pē puhi riā piyēkou, thê wāhano riā rē wayoiwehei; Ihā thê ā kâi koyokoa thê ā hai tēhē thê ā nohi wārimopou taomi, ma kui yaniki thê riā wārimou kuaahērii, thê ā riā opisi tēamou kuaaherii, thê ā riā wēyēmou piyēkou wānoshimamotima thê pē hami.

Hetipētēwē 20

Hititiwē thê pē ihami totihitawe thamotima thê kuprawē ai thê ā rēamaihā thê pē ā riā wayou kâi yototai thê pē riā rē thaiwehei thê pē wāhano wayoihe ha.

Ai thēni yototamotima thê hami thê shimai ayao taomi.

Hetipētēwē 21

Hititiwē thê pē ihami totihitawē thamotima thê kuprawē patamorēwē thê pē rē kui thê pē ā wayou kâi riā roaai narēō kama peni a pata rē thanowēhēi pē mithari ha kâi.

Hititiwē thê pē ihami totihitawē thamotima thê kuprawē kama thê pē rē pēriprai hami thê ohotepi rē shatiprai, thê pē riā ohotamou toaai.

Patamorēwē thê pē rē kui, thê pē shaponopi kâi rē pēriowei thê pē iha thê pē patamou. Ei thê rē kui thê pē shaponopi kâi rē pēriowei thê peni thê pē wāhano ha wayoaheni thê yaiaprai shoahe yaiamotima thê kuo tēhē thê pē yaiamou hāthōō.

Hetipētēwē 22

Hititiwē thê pē ihami totihitawē thamotima thê kuprawē kama thê pē rē pēriprai hami pata thê pēni thê pē nohi kâi hatukepopehe, ai urihitheri thê pē patani thê pē nohi kâi hatukēpopehē, thê pē puhi topramapopehe, ihī thê nohi yaimopou thê pē puhi wetinahamou maōpē, peheti thê pē pērihopē.

Hetipētēwē 23

Hititiwē thê pē ihami totihitawē thamotima thê kuprawē, thê pē urihipi riā hupēo, ai thê ā rēamaihā thê ohotē hurimopē, thê prewē thaporaheni, pata thēni ohotamorēwē thê pē rē kui thê pē nohi pēyēpou thê pē ohotē kuo maō tēhē.

Hititiwē thê pē ihami totihitawē thamotima thê kuprawē, thê pē ohotamou he usukuwē rē kurenaha thê pē no kâi kōō he usukuopē.

Hititiwē thê pē ihami totihitawē thamotima thê kuprawē he husukuwē thê pē no kōō, thê pē puhi kâi owēhēo, kama pē shīro rē kui e pē puhi kâi pērio mi hetuopē e thēki peheriproimiha pē kâi rē pērioweini ai e thēki he riā tikēai e thēki he usukuopē.

Hititiwē thê pē ihami totihitawē thamotima thê kuprawē, sindicato thê pē riā thayou, thê pēhe rumopopē.

Hetipētēwē 24

Hititiwē thê pē ihami totihitawē thamotima thê kuprawē, thê pē washimi horuu yānikio pariopē, thê pē riā huu toatarou, toprao thê pē kâi rē ohotamonowēi thê no kâi riā kōāmamou thê ma yānikia parirani.

Hetipētēwē 25

Hititiwē thê pē ihami totihitawē thamotima thê kuprawē, thê pē riā pērio toprao kama theri thê pē shīro sho, nii pē hami, yahi pē sho, thê pē kâi temio topraopē, thê pē kâi titihopē , thê pē nohi kâi rē yaimopouwei thê pē sho. Enaha hititiwē thê pē pehi totihitawē thamotima thê ha thê kua thê pē rē ohotamoumai, pē rē shawarapiwei, thê pē no rē huwēmai, thê pē he rē paharaprai, thê pē rē wārō rē patai, thê pē suwe kâi rē patai, ai thê pē wārītiwe kâini thê pē pehetipopehe.

Suwē shipēnapi thê pē rē kui, ihiru, marānapi, suwēhēri marānapi thê pē komi sho, totihitawē thamotima thēni, thê pē nohi thamopou topraopē. Hititiwē ihiru hīpi kua pē rē keprouwei, pē hīpi ma kua mai pē kâi rē keprouwei, totihitawē thamotima thê kuprawē peheti pē nohi kâi thaprawē.

Hetipētēwē26

Hititiwē thê pē ihami totihitawē thamotima thê kuprawē, thê pē kâi hirayopē. Hiramotima thê pē rē kui, nomraiha thê pē hiramou pariopē. Hiramou pariotima thê hami thê pē ihirupi shimio he parohoopē. Hiramou pariotima thê nohā hami ihā hititiwē thê pē ōnimou taai he parohoopē; ōnimou pata thê rē kui hititiwē thê pē pehi ma kui thê pē puhi moyāwei rē thê pē pehi shīro kuopē.

Hiramotima pē hami, puhi tao thê pē kupropē ihī thê no āhā totihitawē thamotima thê pē nohi asipopehe ai the ā rēamai thê sho; thê pē rē pēriprawē piyēkēi thê pēni, thê pē nohi kâi rē yaipouwehei thê pē hami, thê pē no ihīpipopehe, thê pē kâi puhipoyopē, Ō.N.U. thēni thê thamai rē puhiiwei thê ā riā praukamai ha piyēkonī, thê pē ā riā topramapou ha totihioni.

Pē nūi, pē hīi thê pēni e thê hiramai shi rē topraowehei e thê hiramai puhipehe.

Hetipētēwē 27

Komi hititiwē thê pē ihami totihitawē thamotima thê kuprawē, thê pē rē pērihii thê pēni thê pē rē tai rē piyēkouwehei thê pē hami ai thê ā rēamaihā, thê pē no riā taayou, thê pē ā kâi riā toprao, matohi pē rē thanowēhēi pē hami, ihī thê pē matohi ha thê pē ā riā toprarou.

Hititiwē thê pē ihami totihitawē thamotima thê kuprawē , thê pē nohi thaopē, kama thê pēni thê pē rē thaiwehei thê pē hami, thê kâi rē ōnimaiwēhēi thê pē hami, noshiharirawē thê pē kâi rē kopemaiwēhēi hami kâi.

Hetipētēwē 28

Komi hititiwē thê pē ihami totihitawē thamotima thê kuprawē ai thê pēni thê ā rē thaiwehei, thê ā nosi popehe.

Hetipētēwē 29

Komi hititiwē thê pēni ohotē thê huripehe kama thê pē shaponopi hami, ihī pē shapono hami toprao thê pē parahērii.

Totihitawē thamotima thê hami thê pē rē wapēoheriwei ai thê pē ihami totihitawē thamotima thê pē kâi kuprawē, ihī ei thēni thê nohi hatukēmapou totihitawē thamotima thê rē kui ai thê ā reamai thê sho. Mihi totihitawē thamotima thê hami peheti thê pē kuaahērii, yaiamotima thê hami thê pē rē patamou thê kuo tēhē.

Hei totihitawē thamotima thê rē kui ai thê ā kua mai thê pē sho Ō.N.U. thê rē kuuwei thê ā nohi wārīpou taomi.

Hetipētēwē30

Thê pē rē pērihouwei thê pēni, yototarewē pēni , ai yāmi thēni wa katehano thēni totihitawē thamotima thê wāhā no wēyēi ha ai thēni thê wāhā nohi taeai taomi, thê wāhā kâi hemihiprai ayao taomi.